

Basef Amama Jon Nali' Nanda'ami

Basef bandami Jon nali' nanda'ami

- 1:1-4 Jon na'i basef Godi nafela ukup asasimi ma sondanifel
1:5-2:29 God anan nafifili. Ea' ape' mofe' nafifili ma monda' waf
bu'unai ukup mimila epes hiesi
3:1-24 Ape' mape awasi Godi. Ea' dei' ape' ukup maimaila sahin owan
ape'isi, ea' epes awasi Satani sanda' waf aonai la'ela'ef.
4:1-6 Ape' mowaloga ambagof hiami mogawa ambal Godi o ambal
aonai Satani.
4:7-5:21 God nasapa' Nogalomana Ananinai nafi'i etap anae'
nih'iambapa waf ukup maimailasanai. Ea' mombale'efana ma mope
la'ifipa molomana mofa' ambal namunai.
-

Basef ambal namunai napaimi

1 ¹Afa' wanda' basef amama ma anona aman agilinama Basef^{Anona}
anan nase'apa ambal namunai napaipai. Aman anama fowa'
gani damba damba nepe. Afa' wame' basef ananimi watolona naep
mahapilana lagof afa'imi. ²Ambal anama^a namunai nataga ea' afa'
watolona naep afa'imi. Amama atom dei' afa' wawalipipa ma ambal
anama nepe la'ela'efi. Ambal anama fowa' nepe naloma Ahalomapa dei'
nataga alihina watolona. ³Amamaga amama afa' watolom wame'ami
dei' wa'ipipam ipe' wapot'i ma pepe ukup etifim pelomafa. Afa' wape
wambota atona waloma Ahalomafa naloma Nogalomana ananinai Jisas
Krais. ⁴Afa' wanda' basef amama ma anona nemaf danifel ape'inai
notaga lu'una ma ape'!

Anona aman agilinama Basef, ma'i Jisas Krais atona. **a** Basefa ambal anama ofagema
basef biefim. Anom ma'i agel wa'ana Krais, si'i basef mape lain 1. Ea' anom ma'i ambal si'i
ambal epesi.

God anan nafifili nanda' waf bu'unai atona

⁵Basef amama afā' wame'ama anan na'ama. God anan nafifili afitinai. Ina anona owamb nailana, owa!. ⁶I'i ape' mi'i mope ukup etifim molomana, ama ape' ata' mape manda' waf aonai si'i mape owamb atona, ape' mambaso'ma ape' atepa ma basef ape'imi maloma fe' ape'inai. ⁷Anan nafifili afitinai. I'i mope mififil si'i anan waf aonai a'apa, ea' mope ukup etifim moloma sahin owan hiesi. Jisas Nogalomana Godi. Ea' esimbel ananimi masa'opa waf aonai ape' manda'anai hianai hi'alana mataga bo'opa. ⁸I'i ape' mi'i waf aonai a'apa, ape' mambaso'ma ape' atepa ea' basef endilisimi ina mapipa, owa!. ⁹I'i ape' mowalapa waf aonai ape' manda'anai alihina, atuwasi Anan nokwahomapa waf hianai aonai ape' manda'anai nosa'opapa motaga bo'opa andeande!. Basef fowa' na'i endilisimi atom nonda' waf bu'unai andeande!. ¹⁰I'i ape' mi'i, "Ape' owa' monda' waf aonai", ape' mofala God ma'i anan aman na'i basef baso'maimi. Ea' basef ananimi ina mape opalef ape'imi, owa!.

Krais aman nagiambamapai

2 ¹Ipe' alupipei ae'ipei, ae' okom nainailipa, anda' basef amama mafe'mago ipe' ma ina penda' waf aonai, owa!. I'i enin open nenda' waf aonai, enin anan niegiambamani nape. Anan Jisas Krais bo'ona andeande!. Anan nahali' Ahalomana ma nokwahoman waf aonai open anama nanda'anai. ²Anan atona nahagofa okom wandafunai Godi naga' nakwaha waf aonai ape' manda'anai. Ea' ina nakwaha waf aonai ape' manda'anai atona, owa!. Anan nakwaha waf aonai ma epes hiesi etapasi hi' alas. ³I'i ape' mila basef Godi la'ifipa, ape' mogawa anan endilisi. ⁴Emi egafis sa'i, "Ape' mogawa God andeande!", ama esis owa' sila basef Godi, esis sambaso'ami. Ea' basef endilisimi ina mape opalef asasimi, owa!. ⁵Ea' emi egafis sila basef Ananimi, esis ukup si'im maila God endilisi. Ea' ape' mogawa ape' mape la'ifipa maloma Jisas. ⁶Emi egafis sa'i, "Ape' mape la'ifipa maloma God", pe asasinai notaga bo'ona si'i pe Jisas Kraisi.

Emi egafis ukup maimaila sahin owan asasisi, la'ela'ef sape nafifili

⁷Alupipei ae'ipei, ae' okom nainailipa. Dei' ae' anda' basef amama mafe'mago ipe', ina anona mi'uli dambainai, owa!. Ae' a'ipipa mi'uli anama atona fowa'inai, fowa' damba damba pegawana. Mi'uli anama basef ipe' pamē' ea!. ⁸Basef la'ifimi ma mi'uli anama dei' anda'am mafe'mago ipe', amama dambaimi. Ea' mataga alihima Krais nailam dei' ipe' wapotil' pailam. Dei' main, owamb dei' na'i nofe' ea' nafifili endilisinai nataga nape.

⁹Emi egafis si'i, "Ape' mape nafifili," ama esis opalef aoma sahin owan asasisi, epes isima ata' sape owamb la'ela'ef. ¹⁰Emi egafis ukup maimaila

esis sahin owani, esis sape naifili. Ea' epes isima ina ata' anona waf aonai napais nanda'as sowa, owa!. ¹¹Ea' emi egafis opalef aoma sahin owan asasisi si'i naumbih, epes isima ata' sape owamb ea' safe' owamb atona sasopama naep asasimi. Ea' ina sati eaf sailana, owa!. ¹²Ipe' awasi ae'ipei, God nakwaha waf aonai ipe' panda'anai hi'alana ma agel Kraisi. Amama atom dei' anda' basef amama mafe'mago ipe!. ¹³Ipe' ahape, ipe' pegawa aman anama andeande' fowa' damba damba nape la'ela'efi. Ea' dei' anda' basef amama mafe'mago ipe!. Ipe' awomipei, ipe' pali'amona wandaf aman aonai pikila'ana. Amama atom dei' anda' basef amama mafe'mago ipe!. ¹⁴Ipe' awasi, ipe' pegawa Ahalomapa andeande!. Ea' dei' anda' basef amama mafe'mepago. Ipe' ahape pegawa aman anama fowa' damba damba nape nafi'i nafi'i la'ela'ef nape. Amama atom dei' anda' basef amama mafe'mepago. Ea' ipe' awomipei, ipe' la'ifipei ma penda' waf bu'unai. Ea' basef Godi dei' mape nomon opalef ipe'imi. Ipe' pali'amona wandafa aman aonai pikila'ana.

Ape' ina ukup mimila waf etapanai, hapainai

¹⁵Ipe' ina ukup mimila waf etapanai o anom amamaga awami mape etapi, owa!. I'i ipe' ukup mimila waf aonai etapanai, ipe' ina ukup maimaila Ahalomapa, owa!. ¹⁶Ape' mogawa epes saloma amamaga hiami mape etapi amama na'ama. Amamaga amama opalef apimi mohafemami maloma epes saloma amamaga amama epes satolom opalef kowalasami maloma amamaga amama enis satilis safela agof lu'umami, amamaga amama ina mafil'i Ahalomapa, owa!. Amama mataga etap anae!. ¹⁷Waf etapanai naloma amamaga hiami epes ukup mohafemami anona nemaf hegilibam, ea' emi egafis saila basefa okom Godi, epes isima sape la'ela'ef hihif.

Naumbih Kraisi mataga ea'

¹⁸Ipe' alupipei ae'ipei, ae' okom maimailipa, dei' nemaf na'i hi'ilana. Fowa' ipe' pame' basefa naumbih Kraisi ma'i motaga. Ea' dei' naumbih Ananimi hiami mataga ea!. Ape' mogawa dei' nogota na'i hi'ilana. ¹⁹Enis epes sakwaha ape' ea!. Fowa' epes isima ina ape'isi endilisi, owa!. I'i ape'isi endilisi, esis sope solomapa la'ela'ef. Owa!. Esis sakwahepa ea!. Amama atom dei' ape' mogawas andeande', epes isima hiesi ina epes ape'isi, owa!.

²⁰Ea' ipe' Krais nase'epa Ambal Bu'unai Godi ea!. Dei' ipe' hipei pegawa basef endilisi. ²¹Ipe' ina pelolama basef amama endilisi ma dei' enda'mepago basef amama, owa!. Ipe' pegawam. Ea' pegawa basef baso'maimi ina mawalapa basef amama endilisi, owa!. Amama atom dei' anda'ago basef amama ma ipe!. ²²Aman nambaso'masi anan emi? Anan aman anama nambaso'mas na'i Jisas ina Krais, God nasapa'ana

nafil'i, owa!. Aman anama naumbih Kraisi. Anan nowa' alafugama Ahalomapa naloma Nogalomana wapotil'. ²³Emi egafis sowa' alafugaha Nogalomana, esis sowa' alafugaha Ahalomana wapotil'. Ea' emi egafis saso' opalefa Nogalomana, Ahalomapa nepe nomona opalef asasimi.

Ambal Bu'unai Godi nawalipapa basef endilisimi

²⁴Basef amama fowa' damba damba ipe' pame'ami, amama hapilam opalef ipe'imi la'ifipa. I'i ipe' pembale'efa basef amama pali' pame'ami opalef ipe'imi la'ifipa, ipe' pepe la'ifipa peloma Jisas Nogalomana Godi noloma Ahalomana mope la'ela'ef molomepa. ²⁵Krais na'ipapa basef endilisimi la'ifimi, Anan anona nemaf nose'apa ambal namunai mope andeande' la'ela'ef. ²⁶Ae' anda' basef amama mafe'mago ipe' awalapa waf epes isima sa'i seambaso'mipei. ²⁷Ea' ipe', Krais nase'epa Ambal Bu'unai Ananinai. Ea' Ambal Ananinai nepe nalomepa opalef ipe'imi nomon. Amama atom dei' ipe' ina gawa a'epa ma enin epen newalipipa, owa!. Ambal Bu'unai Kraisi nawalipapa ma amamaga hiami ina nambaso'mapa, owa!. Dei' ipe' pembale'efa Krais pape la'ifipa paloma anan. ²⁸Ipe' awasi ae'ipei, ae' okom nainailipa a'i pepe la'ifipa peloma Anan ama anona nemaf notaga nondawalap, ape' ina ambagof aom, owa!. Ape' mitu la'ifipa ma naep Ananimi. ²⁹Ipe' pegawa Krais Anan bu'unai andeande' endilisi. Ea' pegawa anom basef wapotil', emi egafis saila waf bu'unai andeande', esis awasi Godi.

Dei' ape' mape awasi Godi

3 ¹Eh! Ahalomapa God okom nainailapa endilisi. Ea' Anan nofalapa awasi ananipai. Endilisi, ape' awasi ananipai atepa. Isima sandaiwa'ma Godi sape etap anae', esis ina sogawa God, owa!. Amama atom dei' esis ina sagawa ape' wapotil'. ²Ipe' alupipei, ae' okom nainailipa. Dei' ape' mape awasi Godi. Ea' anona nemaf mope mi'imama, amama ape' ina dei' mogawam, ata' owa!. Ea' ape' mogawa anona nemaf Krais notaga alihina, nemaf anama motolona notaga nope endilisi si'i Anan nepe. ³Emi egafis sape sohafa Anan nufil'i, esis sape sandondombam opalef asasimi la'ela'ef ma sope bo'wes andeande' si'i Krais nepe. ⁴Emi egafis sanda' waf aonai, esis sosambala mi'uli Godi. Dei' main, sanda' waf aonai atona dei' satopa' mi'uli anama. ⁵Ipe' pegawa Krais nataga ma nakwaha waf aonai ape' manda'anai hi'alana. Anan ina nanda' anona waf aonai, owa!. ⁶Ea' emi egafis sape la'lifis saloma Anan, isima ina ata' sape saila waf aonai, owa!. I'i emi egafis saila waf aonai, ukup asisimi ina mati Krais sogawana, owa!.

⁷Ipe' alupipei ae'ipei, pindumafuma andeande'!. Na'ama enin epen nembaso'mepa. Emi egafis sanda' waf bu'unai, esis sape andeande' si'i Krais nepe. ⁸Satan nanda' waf aonai fowa' damba damba nafil'i nafil'i

dei' ata' nape la'ela'ef. Emi egafis sanda' waf aonai la'ela'ef sapomanai, esis epes Satani. Nogalomana Godi nafi'i nataga nandawalapa main? Ma nohambombaga opeh Satan nanda'ami. ⁹Emi egafis sape awasi Godi, esis ina sape sanda' waf aonai la'ela'ef, owa!. Dei' main, okom Godi nape opalef asasinai ea' esis awasi Godi. Ea' esis ina la'ifisa ata' sonda' waf aonai la'ela'ef, owa!. ¹⁰I'i ape' mi'i mogawa open emi egalin, nogalomana Satani o nogalomana Godi, ape' mogowas na'ama. Emi egalin owa' nanda' waf bu'unai ma owa' okom ninila alupusi ananisi, enin ina open Godi, owa!.

Waf ukup maimaila sahin owan ape'isi atona etin

¹¹Basef fowa' damba damba ipe' pamel'ami amama. Ape' ukup mimila esis sahin owan endilisi. ¹²Ape' ina mila waf Keini, hapainai. Kein wambota aman aonai Satani ea' naha ovalomana Abel naga!. Dei' maina nahana naga? Anan kowalana ma opeh bu'wami ovalomana nanda'ami dei' nahana naga!. Ea' opeh ananimi aom. ¹³Ipe' sahin owan ae'ipei, i'i esis sape etapi sowa' alafugaha Godi sindaiwa'mepa, ipe' ina gegelelesipa, owa!. ¹⁴Ape' ukup maimaila esis sahin owan, amama ape' mogawa dei' makwahona waf anama ga'inai mataga mofa' ambal namunai. Dei' main? Ape' ukup maimaila esis sahin owan endilisi. Emi egafis owa' ukup mimila sahin owan asasisi, esis ata' sape la'ela'ef waf ga'inai. ¹⁵Emi egafis ukup aoma sahin owan asasisi, esis si'i saha enis amam nematawa saga'i. Ea' ipe' pegawa epes saha enis saga'i, esis ina dei' sefa' ambal namunai sapaina sope andeande' la'ela'ef, owa'etin. ¹⁶Waf anama ape' ukup mimila enis epes mogawana na'ama. Krais nakwaha ambal ananinai ma nagiambamapa. Amama atom ape' wapotil' mokwaha ambagof ape'imi ma migiambama sahin owan ape'isi. ¹⁷I'i emi egafis amamaga hiamisi ma siti sahin owan amamaga a'ani ma esis owa' ukup mimila sahin owan, epes isima ina ukup maimaila God, owa!. Dei' maina epes isima sa'i, "Ukup ape'imi maimaila God"? Owa!, esis sambaso'am. ¹⁸Alupipei ae'ipei, ape' ina ukup maimaila esis alupisi ma mi'ipasa basefa malogof atom wafimi, owa!. Ape' ukup mimilas endilisi migiambamas monda' waf bu'unai endilisinai mihi'ambamasana.

Epes sembale'efana endilisi, esis ina umbamahasa naep Godi, owa!. Esis la'ifis sape

¹⁹I'i ape' monda' waf anama ma ukup mimila sahin owan ape'isi, ape' mogawa maila basef endilisimi. Waf anama nanda' opalef ape'imi awanema mope la'ifipa ma naep Godi. ²⁰I'i basef mape opalef nomoni ma'iami ma'ipapa basef mihi'ambapa waf ape' manda'anai aona, God dembinai nikila' ukup ape'imi ea' nagawa amamaga hiami.

²¹Alupipei ae'ipei, ae' okom nainailipa. I'i basef mape opalef nomoni ma'iami ma'ipapa basef mihi'ambapa waf ape' manda'anai ina aona,

ape' mefe'ma God opalef ape'imi la'ifim. ²² I'i ape' mi'i monda' beten mohali'ana ma anom amamaga, anan nose'apami. Dei' main, ape' maila okom ananinai manda' amamaga anan nandanifel ma ape' manda'am. ²³ Basef la'ifimi Godi ma'i na'ama ma'i ape' mombale'efa agel nogalomanai Jisas Krais ea' ukup mimila sahin owan ape'isi si'i Anan na'ipapa basef la'ifimi. ²⁴ Emi egafis saila basef Godi la'ifis, esis sope la'ifis soloma God ea' God nape la'ifina nolomas. Anan nase'apa Ambal Bu'unai Ananinai dei' mogawa God nape la'ifina nalomapa.

Basef biefima Ambal Bu'unai Godi naloma ambal aonai nambaso'mami

4 ¹Alupipei ae'ipei, amam profet mambaso'mami mafe'agon anama etap hiagoma. Ipe' ina pembale'efa epes isima hiesi sa'i, "Ae' Ambal Bu'unai Godi napaiwei." Owa!. Ipe' ata' pegwaloga ambagof amama hiami pendendomam ama pegawa amam mataga mafi'i Ambal Bu'unai Godi o owa!? ²Ipe' pegawa Ambal Bu'unai Godi na'ama. Emi egafis sa'i, "Endilisi, Jisas Krais nafi'i nataga epen endilisinai", epes isima Ambal Bu'unai Godi napais opalef asasimi. ³Ea' emi egafis owa' si'iam na'ama ma Krais, Ambal Bu'unai Godi ina nape esis, owa!. Ambal nape epes isima anan nanda' naumbih naloma Krais. Fowa' pame' basefa ambal aonai na'i nonda' naumbih noloma Kraisi nifi'i dei' nafi'i nape ea' etap anae!.

⁴Ipe' alupipei ae'ipei, ipe' epes Godi ea' panda' wandaf paloma amam profet awami mambaso'mami pikila'am. Dei' main, Ambal Bu'unai Godi nape nomon opalef ipe'imi anan la'ifinai nikila' aman aonai nape etap anae!. ⁵Epes isima saila waf etapanai sa'i basef etapami atom, epes etapasi sembale'efam. Dei' main, esis isima etapasi etis. ⁶Ea' ape' epes Godi. Emi egafis sogawa God, esis seme' basef ape'imi. Ea' emi egafis owa' epes Godi, isima ina same' basef ape'imi, owa!. Ea' amama atom dei' ikwaf anama nihi'ambapa ma mogawa epes isima. I'i Ambal Bu'unai Godi endilisinai nupais, seme' basef ape'imi. Ea' i'i ambal nambaso'mami nupais, ina seme' ape', owa!.

God okom nainailapa endilisi

⁷Ipe', ae' okom nainailipei, ape' ukup mimila sahin owan ape'isi. Dei' main, waf anama nafi'i God. Emi egafis ukup maimaila sahin owan, esis awasi Godi ea' dei' segawa God saila basef Ananimi. ⁸Emi egafis owa' ukup mimila sahin owan, esis ina sogawa God, owa!. Dei' main, God okom nainaila epes hiesi. ⁹God nihi'ambapa anan okom nainailapa na'ama. Anan nasapa' Nogalomana Ananinai atotona nafi'i etap anae' ma ape' mofa' ambal namunai ma Anan. ¹⁰Basef ofagema ma God okom nainaila ape' amama. Ape' ina mal'i ukup maimailana, owa!. Anan nali' okom nainailapa ea' nasapa' Nogalomana Ananinai nafi'i ma nanda'

okom wandafunai Godi naga' nakwaha waf aonai ape' manda'anai.¹¹ Ipe' alupipei, waf anama atona nihilambapa God okom nainailopa endilisi. Ea' ape' wapotil' ukup mimila sahin owan ape'isi endilisi.¹² Ina enin epen nati God, owa!. I'i ape' atepa ukup mimila sahin owan ape'isi, God nope la'ifina ma ape' ea' okom ananinai nainaila ape' i atuwasi nope nolomapa opalef ape'imi nomona monda'am na'ama etin ape' ukup mimila sahin owan ape'isi.

¹³ Dei' ape' mogawa ape' mape la'ifipa maloma God ea' anan nape nalomapa. Dei' main? Anan nase'apa Ambal Bu'unai Ananinai nape nalomapa.¹⁴ Ea' ape' mogawa Ahalomapa nasapa' Nogalomana ananinai ma nofa'ai epes hiesi sape etapi sotanimani ma anan. Ape' mati amamaga amama ma anan nofa'ai epes sotanimai ma'ipasam.¹⁵ Emi egafis sawalapa basef alihiguma sa'i, "Endilisi, Jisas anan Nogalomana Godi", God nape la'ifina nalomas, esis wapotil' sape la'ifisa Anan.¹⁶ Amama atom dei' ape' mogawa mombale'efa God anan okom nainailapa endilisi.

God Anan ofagonama okom nainaila epes hiesi. Emi egafis sape ukup maimaila God naloma epes hiesi la'ela'ef, esis sape la'ifis saloma God ea' Anan nape la'ifina nalomas.¹⁷ Waf ukup maimaila esis Kristen alupusi endilisi, amama mataga bo'om endilisi ma ape' mitu la'ifipa nemaf anama lu'unai ma God nowalogapa. Dei' main, Anan napaipa nomon, ea' mape etap anae' si'i Krais nape. Ape' ina umbamahapa ma nemaf anama God nowalogapa, owa!.¹⁸ God okom nainailapa, ape' wapotil' ukup maimailana. Ea' ina umbamahapa, owa!. I'i waf anama notaga bo'ona endilisi ma ape', anama natofa waf umbamahapamanai nowala hi'alana. Dei' main, epes umbamahasa amamaga nimanimi anona nemaf God nowalogasa waf aonai nose'asami. Emi egafis umbamahas, waf ukup maimaila God ina nataga bo'ona endilisi ma esis, ata' owa!.

¹⁹ God nali' okom nainailapa endilisi. Amama atom dei' ape' ukup maimaila anan naloma epes hiesi wapotil'.²⁰ I'i enis epes si'i, "Ape' ukup maimaila God," ama esis ukup wandafuma Kristen alupusi, epes isima sambaso'mami. Dei' main? Ina enin epen atitin nati God, owa!. Emi egafis sati alupusi asasisi ma owa' ukup mimilas, epes isima ina la'ifisa ukup mila God owa' seatolona naepi, owa!.²¹ Amama Krais na'ipapam la'ifimi amama. Emi egafis ukup maimaila God, epes isima ukup mimila sahin owan asasisi wapotil'.

Epes sombale'efanai sahagofa waf aonai etapanai

5 ¹Emi egafis sembale'efa Jisas anan Krais God nasapa'ana nafi'i, epes isima awasi Godi. Ea' emi egafis ukup maimaila ahalomas, esis ukup maimaila awasi ananisi wapotil'.² I'i ape' ukup mimila God ama mila basef la'ifimi Ananimi, anona nemaf ape' mogawa ukup maimaila awasi Ananisi wapotil'.³ Waf ofagema ma ape' ukup maimaila God anama. Ape' maila basef

mi'uli la'ifinai Ananinai, ina ahifina endilisi, owa!. ⁴Dei' main, emi egafis sape awasi Godi nanda'as sataga dambais, epes isima la'ifis sahagofa waf etapanai aonai. Ape' mombale'efa God dei' ape' mikila' wandaf mahagofa waf etapanai aonai. ⁵Emi egafis sikila' wandafa waf aonai nahagofa waf aonai etapanai? Epes sembale'efa Jisas sa'i anan Nogalomana Godi, esis etis sikila'ana.

God nawalapa basef alihima Nogalomana Ananinai

⁶ Jisas Krais ma'una aman anama nafi'i. Ea' Anan nefal' baptais embel sahana naga' esimbel Ananimi malo. Anan ina nafi'i ma waf nefal' baptaisa embel atom, owa!. Anan nafi'i ma waf sahana naga' esimbel ananimi malo. Ambal Bu'unai Godi ofagonama waf endilisinai hi'alana. Ea' Ambal anama nawalipasa basef amama ma Krais endilisimi. ⁷⁻⁸Ambal Bu'unai Godi naloma embel maloma esimbel, amama wenifim mawalapa basef ofagema amama atom. ⁹Ape' mombale'efa basef epes sawalipasami. Ea' basef God nawalipapami la'ifimi mikila' basef epesi. Dei' main, basef amama ma'i Nogalomana ananinai. ¹⁰Ea' emi egafis sembale'efa Nogalomana Godi, basef amama endilisimi mape nomon okom ananinai. Ea' emi egafis owa' sombale'efa God, epes isima na'i God aman nambaso'mami. Dei' main, isima ina sembale'efa basef amama God na'ima Nogalomana Ananinai, owa!. ¹¹Ea' basef amama endilisimi ma'i na'ama. God nase'apa ambal namunai ma mape andeande' la'ela'ef. Ambal namunai anama Anan nase'apana Nogalomana Ananinai atona. ¹²Emi egafis sape la'ifis saloma Nogalomana, isima dei' sefa' ambal namunai. Ea' emi egafis owa' sope la'ifisa Nogalomana Godi, isima ina sofa' ambal namunai ma sope andeande' la'ela'ef, owa!.

Ape' mogawa mofa' ambal namunai nape la'ela'ef hihifi

¹³ Ae' anda' basef mafe'mago ipe' pembale'efa agel Nogalomana Godi. Anda'ama ipe' pegawa dei' pefa' ambal namunai pape andeande' la'ela'ef hihif. ¹⁴Ape' mogawa, i'i ape' mila okom Godi atona monda' betena maim amamaga, Anan nome' beten ape'inai. Ea' maina nemaf mefe' felefele'ma Anan monda' beten, ina umbamahapa ma Anan, owa!. Ukup ape'imi mape la'ifim. ¹⁵Ape' mogawa Anan name' betena maim amamaga dei' mahali'anami. Ea' mogawa dei' mape si'i mofa' amamaga amama ea!.

¹⁶⁻¹⁷Epes sanda' waf aonai sawala basef Godi la'ifimi. Ea' waf hianai aonai ina nanda' epes saga', owa!. I'i enin epen niti enin sahin owan ananini nenda' anona waf aonai owa' nenda' epen inima nega' higililan, epen inima nanda' waf anama nenda' betena God, nese'an ambal namunai. Endilisi, anona waf atotona aonai nanda' epes saga' hegilalas.^b Ae' ina a'ipipa ma penda' betena epes sanda' waf anama, owa!.

b Waf anama na'i waf aonai si'i Judas nanda'anai nandaiwa'ma nembale'efa God. Na'ama dei' anan naga' hegilalana.

¹⁸ Ape' mogawa emi egafis sape awasi Godi, esis ina sape sanda' waf aonai la'ela'ef, owa!. Dei' main, Nogalomana Godi numafias andeande'ma pepel ananinai ma aman aonai ina nahambombagas, owa!. ¹⁹ Ape' mogawa ape' awasi Godi, ea' isima owa' awasi Godi sape owina aman aonai Satan anan dembinai asasinai.

²⁰ Ape' mogawa Nogalomana Godi nafi'i ma nose'apa gawa ma mogawa anan God endilisinai. Ape' mape la'ifipa ma Anan endilisinai naloma Nogalomana Ananinai Jisas Krais. God anama endilisinai anan ofagonama ambal namunai napaipa mape andeande' la'ela'ef hihif.

²¹ Awasi ae'ipei, ipe' pepe la'ifipa pewa' alafugaha god baso'mainai hianai. Ea' ma'um.